

Bosna i Hercegovina
Federacija Bosne i Hercegovine
Kanton Središnja Bosna-Srednjobosanski Kanton
KANTONALNO TUŽILAŠTVO/ TUŽITELJSTVO
T R A V N I K
Broj: T06 0 KT 0034084 23
Datum, 15.02.2024.godine

OPĆINSKOM SUDU TRAVNIK
-sudiji za prethodno saslušanje-
TRAVNIK

Na osnovu člana 45. stav 1. i 2. tačka i) i člana 241. stav 1. Zakona o krivičnom postupku Federacije Bosne i Hercegovine (ZKP F BiH), podižem

O P T U Ž N I C U

Protiv:
Edin Beganović, rođen 1991.godine

Zbog postojanja osnovane sumnje što je:

1. Dana 04.11.2023.godine, protivno odredbi člana 4. u vezi sa članom 19. i 20. Zakona o sprečavanju i suzbijanju zloupotrebe opojnih droga BiH (Službeni glasnik BiH broj 8/06, 103/08 i 51/11) radi dalje prodaje neovlašteno kupio opojnu drogu amfetamin, kokain i Cannabis, iako je znao i bio svjestan da te materije čine opojnu drogu i da su radi prodaje kupovanje, držanje, prijenos i promet opojne droge zakonom zabranjeni, a što je i htio, tako što je koristeći mobilni telefon marke Iphone model ***, stupio u kontakt sa njemu poznatim osobama i po dogovoru se vozilom marke Škoda Rapid registarskih oznaka *** dovezao u podzemnu garažu tržnog centra *** koji se nalazi na adresi *** i tu preuzeo praškastu bijelu materiju ukupne težine 5.281,62 grama i to 5 paketa upakovanih u prozirnu foliju, pojedinačne težine od 1059,06 grama, 1048,97 grama, 1061,36 grama, 1053,99 grama i 1058,24 grama za koju materiju je vještačenjem utvrđeno da sadrži psihoaktivnu komponentu amfetamin, koja komponenta je pod rednim brojem 1. Liste psihotropnih tvari Tabele II Tvari i biljke pod strogom kontrolom kao takva proglašena zabranjenom, koju drogu je smjestio i držao radi prijenosa u Bihać, u pmv Škoda Rapid, u kom je imao prethodno nabavljenu preciznu digitalnu vagu sa srebrnim natpisom Aosai pocket scale, kao sredstvo za precizno vaganje droge kupcima sa tragovima bijele praškaste materije za koju je vještačenjem utvrđeno da sadrži opojnu komponentu kokain, jedan paketić upakovan u pvc providnu vrećicu, sa sadržajem praškaste bijele materije neto težine 3,507 grama, za koju je vještačenjem utvrđeno da sadrži psihoaktivnu komponentu kokain, koja komponenta je pod rednim brojem 52. Liste opojnih droga Tabele II Tvari i biljke pod strogom kontrolom kao takva proglašena zabranjenom, koju je držao kod sebe, te jedan paketić zv. „čupica“ sa sadržajem zelene biljne materije neto težine 0,060 grama za koju je vještačenjem utvrđeno da sadrži psihoaktivnu komponentu tetrahidrokanabinol i predstavlja opojnu drogu Cannabis, koja komponenta je pod rednim brojem 26. Liste psihotropnih tvari Tabele I Zabranjene tvari i biljke kao takva proglašena zabranjenom, koju je držao u vozilu, nakon čega se sa kupljenom drogom i novcem u iznosu od 2.600,00 KM, uputio radi dalje prodaje u pravcu Bihaća, pa kada je u fazi prijenosa droge

istog dana uočen u mjestu Vrelo-Turbe, općina Travnik, izvršenim pretresom vozila i osoba u vozilu, opojna droga, novac i digitalna vaga su pronađeni i od istog oduzeti

Dakle, neovlašćeno radi prodaje kupio, držao i prenosio opojnu drogu

2. U neutvrđenom periodu, nabavio sredstva koja stvaraju uvjete za neposredno učinjenje, ali nisu dio učinjenja krivičnog djela propisanog zakonom u Federaciji BiH za koje se može izreći kazna zatvora od tri godine ili više na način da je nabavio i držao u vozilu marke Škoda Rapid, registarskih oznaka *** koje je koristio, crni kožni kačket sa umjetnom kosom (smeđa sa prosijedim vlasima), čekić sa drvenom drškom crveno sive boje, stolarsku spravu za struganje sa drvenom drškom i crnu podkapu, kao sredstva podobna za direktno učinjenje krivičnih djela, svjestan da upotrebom istih može izvršiti krivična djela propisana zakonom u Federaciji i prikriti svoj identitet prilikom činjenja krivičnih djela, a što je i htio, koja sredstva su na lokaciji Vrelo- Turbe, općina Travnik pronađena dana 04.11.2023.godine prilikom pretresa pmv Škoda Rapid registarskih oznaka *** i osoba zatečenih u vozilu izvršenog na osnovu usmene naredbe Općinskog suda Travnik, sačinjene od strane OSL MUP-a SBK broj *** od 04.11.2023. godine i od Beganović Edina privremeno oduzeta uz izdavanje potvrde o privremenom oduzimanju predmeta broj *** od 04.11.2023.godine

Dakle, nabavio sredstva koja stvaraju uvjete za neposredno učinjenje, ali nisu dio učinjenja krivičnog djela propisanog zakonom u Federaciji BiH za koje se može izreći kazna zatvora od tri godine ili više

3. U neutvrđenom vremenskom periodu do 04.11.2023.godine, radi upotrebe nabavio lažne javne isprave i to Vozačku dozvolu države Slovačke pod lažnim imenom ***, serijskog broj: ***, na kojoj je navedeno da je izdata dana 14.07.2021.godine sa rokom važenja do 14.07.2031.godine, koja nije nikada izdata od strane nadležnih organa Slovačke i Ličnu kartu serijskog broja: ***, na kojoj je naznačeno da je izdata dana 03.12.2020.godine sa rokom važenja do 03.12.2030.godine, koja je izdata drugom licu dana 21.01.2009.godine sa rokom važenja 12.01.2019.godine, u koje dokumente su utisnute fotografije Beganović Edina, za koje dokumente je vještačenjem utvrđeno da su krivotvoreni, a koje dokumente je Edin Beganović dao Z.H. da mu ih pričuva, i koji su na lokaciji Vrelo- Turbe, općina Travnik dana 04.11.2023.godine prilikom pretresa pmv Škoda Rapid registarskih oznaka *** i osoba u vozilu izvršenog na osnovu usmene naredbe Općinskog suda Travnik, sačinjene od strane OSL MUP-a SBK broj *** od 04.11.2023. godine za pretresanje pmv Škoda Rapid registarskih oznaka *** i osoba zatečenih u vozilu, pronađeni kod Z.H., kao saputnika u vozilu i od istog privremeno oduzeti uz izdavanje potvrde o privremenom oduzimanju predmeta broj *** od 04.11.2023.godine

Dakle, radi upotrebe nabavio dvije lažne javne isprave

Čime je počinio

pod tačkom 1. počinio krivično djelo Neovlaštena proizvodnja i stavljanje u promet opojnih droga iz člana 238 stav 1. KZ FBiH, u sticaju sa

pod tačkom 2. krivičnim djelom Pripremanje krivičnog djela iz člana 339 KZ F BiH i

pod tačkom 3. produženim krivičnim djelom Krivotvorenje isprave iz člana 373 stav 2 u vezi sa stavom 1. u vezi sa članom 55. KZ F BiH, sve u vezi sa članom 54. KZ FBiH.

KANTONALNA TUŽITELJICA